



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

ig tiryimym@aolima

yt tir yimym

TAPAK 8

Voter timbai Biden anema ken o benoktsü memolunger

Marseille coach asütsü Gennaro Gattuso shimogo



VOL. XX NO. 348 (ADOK 348) DIMAPUR ROGONÜ (FRIDAY) RONGJUI (SEPTEMBER) 29, 2023 ₹ 5.00

AFSPA atsülangba ya democracy mezügmeshiba lir: NSF

Dimapur, Rongjui/Sept. 28 (TYO): Naga nunger aliba tesem nung Armed Forces (Special Powers) Act, 1958 (AFSPA) atsülangshiba ya tesasüsü dang masü saka democracy aser meimchir temeden asoshi mezügmeshi lir, ta Naga Students' Federation (NSF) ajanga ashi.

"Law and order" teblemstün mechi September 26, 2023 nü sangdong ka nung AFSPA atsülangtsü Ministry of Home Affairs ajanga telemetba agiba yagi Nagaland state nung tzüzüing ozüing mali aser rongrongshirong agi sünga aliba ama sayur, ta NSF ajanga ashi.

"Küm aika iba ozüing kübok security forces temi sorkar tenüing nung meimchir temeden anema tashiyim amshia, temeden makai nisung tepseta aser 'civil liberties' nung aibelena arur aser iba yongji nüburtem aser security forces tsüingta temolung

melemtep tali adokdaksür," ta NSF tir Medovi Rhi aser tongti zülur Chumben Khuvung nati sangdong ka nung ashi.

Yimjung, ochi obendang aser tatok agütsütepa jungshiteptsü jangra aliba region nung iba ozüing maneni amshiba ajanga democratic tangatetba aser tamendakba samadaksür, ta ashi.

Anungji India sorkari mangatetep aliba AFSPA agiena Naga nunger tashi aser temeden akumtsüboa yimjung asoshi maparen tejangja aser tajung inyaksü ayongzüker, ta NSF ajanga ashi.

"Onoki Government of India dang region nung 'justice, human rights aser rule of law' wazüka ayutsü mepishir."

Maneni teti asoshi Indo-Naga ken o tajungtiba nung tembangtsü asoshi stakeholders ajunga den jembishinü akatsü India sorkar dang ajungshir, ta NSF sangdong ajangasa ashi.

Kohima-Jessami lenmang nung gari mesenzüi alitsü metetdaksü

Dimapur, Rongjui/Sept. 28 (TYO): NH-29 agi kongshiba Kohima-Jessami (Package-II) nung meyi mapang aser ano tanen makai anentsüh aser long anenzüka aluba mechi Deputy Commissioner, Phek, Kulo Mero-i iba lenmang nung senzüsemponger asoshi tekum dangtsü kar metetdaksügo.

Iba lenmang nung anentsüh aser long anenzüka aluba ya talisa Km 30.474 nung Km 53.220 (Design Km. 29.600 to Km. 51.5) nung lir. Vetex Construction Company ajanga mapang shia iba lenmang anepalua yangluaka gari tulutem tanen makai jajaba ajanga maneni raksar, ta September 26, 2023 nü sangdong ka nung ashi.

Iba den ano gari tanen makai

jajaba ajanga lenmang yanglshitsü merangba nunga tetsükdaksü ajuru.

Nüburtem timtem nungi kumzüktsü aser lenmang tajungtiba nung anepalutsü/ yanglutsü mechi iba lenmang nung anogo pongu asoshi anepdang 5:00 ako nungi aonung 8:00 ako tashi gari senzüba nokdangtsü, ta sangdong ajanga ashi.

Iba tenokdangba ya September 27, 2023 nü nungi tenzüka October 2, 2023 tashi alitsü. Senzüsemponger dang talisa light aser medium vehicles tem Zuketsa ajanga jajatsü ajungshir, ta Deputy Commissioner, Phek ajanga sangdong nung ashi.

India PM-i temeshi anogo mapa inyaksü mayongshitsüla: NIPF

Dimapur, Rongjui/Sept. 28 (TYO): India Ato Kilonseri linük tesem ajunga nung ghonda ka mürekmejutsü (one hour shramdaan for swachhata) ayongzükba pelashishia agizüker, saka iba mapa October 1, 2023 nü inyaksü lemetetba angashia aoksar, kechiaser ibai Deobarnü lir, ta Nagaland Indigenous People's Forum (NIPF) sangdong ka ajanga ashi.

Deobarnü mürekmejutsü ayongzükba ajanga linük nung Khristanpur aser talisa Nagaland nung aliba nüburtem temolung yirutsügo. Alima tesem ajunga nung aliba Khristanpur asoshi Deobar ya temeshi anogo ta meteta lir. Ajidang masü Deobarnü ya linük tesem ajungalen national holiday lir. Iba anogo ya metetsümonga shimba asünungbo mesüra Khristanpur asoshi temeshi anogo ya ketdangtsür temi memetet

asünungbo, yangji timtem lir.

India ya 'secular' linük ka ta asenok ajaki meteta lir, kong Constitution ajanga senso ajak nem tamangba yimsü temeden agüja lir. Ajisüaka tang centre nung aliba sorkari aiben Khristanpur asoshi temeshi amungnü, talisa Good Friday aser Christmas amala nung sentong balala ayongzüktsü meranger. Anungji democratic aser secular linük ka nung Narendra Modi-i aniba sorkari iba ama yimya amshiba ya khenyongi tim masü, ta NIPF sangdong ajanga ashi.

Anungji NIPF ajanga India Ato Kilonser dang linük nung senso ajak asoshi iba anogo atsüzüktsü mesüra thinentstü aser linük nung tamangba yimsü mashi ka asoshi tarutsü nunga iba ama temeshi anogo nung linük mayongzüktsü ajungshir, ta NIPF ajangasa ashi.

State sorkari kechiba tesayur nem itasen magütsüteter: RPP

Dimapur, Rongjui/Sept. 28 (TYO): Itasen magütsüba mechi All Nagaland School Teacher's Association (ANSTA) aser Nagaland Government Higher Secondary Schools' Employee Association (NGHSSEA) ajanga 'pen-down strike' alitsü sangdongba sülen Directorate of School Education (DoSE)-i tesayur tsübodaksütsü tasa tamajung yanglua September 25, 2023 nü Nagaland Government Servants Conduct Rules, 1968 indang Rule 25 benokba ya taoksatsüka masü, ta September 28, 2023 nü Rising People's Party (RPP) sangdong ka ajanga ashi.

Küm shia government tesayur temi state sorkar dang parnok itasen mepishia meshir.

Tesayurtem longkak aitba ya yimya ama kumogo, aser yimya tajunglen agi iba ken o benteta department melenshitsu melen tang tesüsa tesayurtem dang osangbener den mejembitsü mesüra item onük jembitsü lokti senden mayongzüktsü totuyuba agütsüba ya khenyongi tim masü aser aitsütsü langa lir, ta RPP sangdong ajanga ashi.

Directorate of School Education ajanga September 25,

2023 nü sangdongba ya tangsa agientsüla. Iba ama tematiba mapa tajung inyakeri par itasen meshiba/ akhangba ya tim dang aser DoSE sangdong nung 'India tejangraba aser temeden asoshi timtem' ta shia alima ama masü.

Principal Director-i meyongnem agüja aliba temenünüsü aser tai aputsü aliba sangdong nung DoSE nung 'highly-qualified officer' kobai "Input" ya nungdaker, ibaji metetner ta RPP ajanga ashi.

Kangasa tamashi, khenyongi yimya masü aser junga ketdang masüba DoSE ajanga tangbo Nagaland Government Servants Conduct Rules 1968 indang Rule 25 tim masüba nung amshia tesayur indang temeden agientsütsü meranger, koba kangasa tim masü aser meshidak lir, ta ashi.

Iba sangdong ya "Teachers' Day" indang sempet kar asü koda? Itasen menur agütsüba mesüra mapang shidak nung magütsüba ajanga government school tem nung sayuba aser angazükba tsütsü timtem ajurubatem DoSE-i shisadanga angatetsü merangdanga ali asü mali? Küm shia government

school tem nung result tamajung malir, ajisüaka tesayur nem par itasen shidak magütsüi merenshia alinung parnoki komasür par mapa nung temolungjang aser tanüla ajak agi tenzüktetsü? ta RPP ajanga asüingdang.

Directorate aser district office tem nung aliba ketdangtsür aser non-teaching staff tema itasen mapang shidak nung angur asü mangur, aji metetner. Aser parnok itasen shidang angur süra, kechiba tesayur bo yamai amshir?

Directorate nungi osang kar ajanga, tesayurtem September ita aser taruba ita trok itasen mangutsü ta ashir. Sorkar mapa inyaker nem itasen agütsütsü asoshi budget nung inoka lir, anungji pei jurila asoshi miimzüka magira itasen magütsütsü otsü nunga mali ta state sorkari meteta alitsüla.

"Discretionary" funds peria lir, anungji state sorkari kechiba tesayur nem itasen magütsüteter? Supreme Court-i angateta aliba ama itasen aser taa magütsüba/ agütsütsü menuba nung timtem lir ta DoSE nung "Dirty tricks" section temi angatetsüla, ta Rising People's Party ajangasa ashi.

Kohima nung tanü nungi "Bloom Bazaar" lapoktsü

Kohima, Rongjui/September 28 (TYO): Nagaland nung tang mezüngbuba Investment Development Authority of Nagaland (IDAN)-i ayongzükba, state yimtiba Kohima kübok Old DC Bungalow, "The Heritage" nung "Bloom Bazaar" lapoktsü renema lir.

Advisor to Chief Minister aser IDAN mendenpuba, Abu Metha-i iba bazaar ya Hokolbarnü 12:00 ako nung tenzüksütsü aser September 30 nikonngdang 5:00 ako nung Nagaland Chief Minister, Neiphu Rio-i lapoktsütsü.


September 28 nü osangbenertem den jembidang Metha-i ashiba agi, iba bazaar lapokba nükjidong tongtipangtibaji naro industry ajungkettsü aser state nung floriculture entrepreneur tem nongita yaritsüba atema dang masü saka danga entrepreneurs aser lokti tentettem nema shilem agidaksütsü asoshi lir.

Iba sentong amenoktsüba sülen Bloom Bazaar ya hopta shia Hokolbar aser Honibarnü anungdang 12:00 ako nungi nikonngdang 7:00 ako tashi lapoktsü, ta pai ashi.

IDAN mendenpubai ashiba agi, bazaar nung stall 45 alitsü, kong tesemdangertemi naro tapu balala angutsü aser iba den kentenba, art, chiyongtsü, jewellery, fashion aser tanurtem atema stall balala alitsü.

Sorkar department 15 aser talisa Horticulture, Agriculture, Industries & Commerce, Nagaland Bamboo Mission, Honey Mission amala Agri aser allied sector temi shilem agitsü, ta Metha-i ashi.

Iba bazaar nung jurila entrepreneur tem nema parnok



Abu Metha

indang oset ajungkettsü aser ayoktsü atema maangka agütsütsü ta ashi.

Iba sentong ajanga naro aser entrepreneurship ajungketba dang masü saka Nagaland nung tourism asoshi tejangraba tali kümdaksütsü imlaba Metha-i lemsatep.

Taruba hoptatem nung iba ya bendanglen nungi dang masü saka local aser domestic tourist tem atema tongtipang tesem ka akümtsü imlar, ta pai ashi.

IDAN mendenpubai ashiba agi, hopta tatem lapokba bazaar ya local tem atema sütöksünema kazütsü asoshi dang masü saka state semdangertem mesüra alima penzürtemi item anogotem nung state semdangtsü asoshi sentong yanglutsü.

Chief Minister Neiphu Rio teyari den külemi Small Finance, Nagaland Rural Bank aser Bank of Baroda amala financial institution tem den longjemer IDAN-i September 30 nü Bloom Bazaar lapokba mapang Floriculture Scheme ka amenoktsütsü, ta Metha-i ashi.

Pai ashiba agi, IDAN-i naro metsürtem jangjatsü merangdar aser parnok nem loan agütsütsü. Iba scheme kübok naro

metsürtem nem dangar dang nungi tetemlok tajemba nung agütsütsü aser collateral aser long term moratoriums malitsü, ta pai ashi.

Iba scheme nükjidong ya naro industry ajungkettsü asoshi lir, aser iba floriculture industry ajanga state rongsenketzung ajungkettsütsü, ta ashi.

Naga nunger tetsürtem dang masü saka naro metsütsü jangrartem noklang aser meyirejang aika pei kidang nungi naro yoka sen aartem aika lir, ta mendenpubai ashiba den IDAN-i parnok ya professional kümdaksünener aser inyakyim tajungtiba aser industry indang 'minimum standard' bener arua parnok shishilempaba ajungkettsünener, ajita asünungdang Nagaland nung tsünütetba naro tem ya künübo national jenjang dang masü saka international jenjang tongtetsü, ta ashi.

Iba dak sendakba nung Metha-i, Naga nunger aser talisa tetsürtemi iba ya inyaktetsü ta temulung lema bilemba lemsatep.

Pai ashiba agi, IDAN-i National aser International company tem den longjemer metsü tajungba bener arutsü aser iba den iba sector nung capacity building exercises, workshops and seminars tem agütsütsü asoshi inyaktepdar.

IDAN-i bushisüingdangba indang lemsatetba mapang Metha-i ashiba agi, Bloom Bazaar 2023 ya tenzüker külen iba ya ajanga weekend employment 450 aser permanent employment 300 dak tema adokdaksütsü.

Maneni IDAN mendenpubai ashiba agi, Nagaland sorkari Bloom Bazaar atema sen lakh 40 sanction sügo.

AIFFSO Nagaland State Unit senden amen



Kohima, Rongjui/Sept. 28 (TYO): All India Freedom Fighters & Successors Organisation (AIFFSO), Nagaland State Unit pur lokti senden Ura Hotel, Kohima nung tanü mena liasü.

Iba sentong nung jembidang North East Region Freedom Fighters & Successors Organisation, working president Neilo Koza-i nüchiso meshiba mapang tim atemba aser 1942 Quit India Movement, koba Mahatma Gandhi-i nüchiso asoshi tenzükba Civil Disobedience Movement ka liasü, item indang teratet shia liasü.

Iba movement nungya

azüdokshi malitsü asoshi nüburtemi longkak aita jaja, kong Gandhi-i British nung dang India nungi payimi ainshitsü khanga liasü, ta pai ashi.

Congress aser British nung ter tsungta jembishinüba nung telemtetba tajung ka mongutetba sülen Quit India Movement ya tenzüka India nung dang British nung ter totuyuba sülen manidaktsü saka nüchiso ngur aliba linük ka ama alitsü ajungshia liasü, ta Koza-i ashi.

Koza-isa kümsük 2023-2026 asoshi AIFFSO Nagaland State Unit ketdangpur team tasen sangdonga liasü, kong

Zeliezhü Angami ya tir ama inyaktsü.

Iba team tasenba nung Kikrovi Sakhrie ya working president, Akiena Meru, Manyasipong Chang & Kavito V. Yeptho nung ya vice presidents, Kehoyi Rengma ya general secretary, T. Chonben Kikon ya secretary, Abino Kezo ya women coordinator, Tsongtsa Khiam ya finance secretary, L. Doji Tsinggr ya publicity secretary, Yeangpong Konyak ya treasurer aser Kedou Wetsah, Yona Konyak & N. Neilo Koza nung ya advisors ama inyaktsü.

AIFFSO Nagaland State Unit nung Nagaland Chief Minister ya chief patron lir.

Iba sentong nung AIFFSO, Nagaland State Unit, president Zeliezhü Angami-i tarur pela agizükba o jembidang iba telok ya nüchiso asoshi rararba nung shilem agirtem den külemi 2009 nung tentet, ta ashi.

AIFFSO State Unit yagi freedom fighters ajangzüktsü asoshi inyaker, ta paisa ashi.

Fazl Ali College nung International Conference ayongzüka agitsü

Dimapur, Rongjui/September 28 (TYO): Fazl Ali College nung October 4 aser 5 nung 'ENVIRONMENTAL HUMANITIES IN THE ANTHROPOCENE ERA: ECOJUSTICE AND SUSTAINABILITY'(ICEHAE) dak sendakba nung International Conference ayongzüka agitsü.

Iba conference ya Association for the Study of Literature and Environment (ASLE India) aser LEMSACHENLOK Longleng na den longjemer Department of English aser Department of Geography, FAC-i ayongzüka agitsü.

Kümtem tsungda Environmental Humanities kanga tongtibang kümogo, kechiyong alima nung anthropogenic inyakyim atema alima ajunga nung ecosystems, alirongsen kanga kara sama aoba aser tzümopung

melenshiba mesemtsü atema lenmang bushitsü asoshi lenla ajak nung tali inyaksangshitsü nungdaker.

Industrial Revolution tenzükba sülen Anthropocene Era tenzükogo, kechiyong meimchir inyakyim ajanga alima ecosystems aser geology melenshiogo. Iba ajanga meimchir aser alima tsungda tesendaktep bushisüngdangtsü nungdaka kümogo, kechiyong anthropogenic inyakyimtem ajanga alirongsentem sama odaktsüba aser menentsüba dang masü saka melenshitsuü amokmerener.

Socio-cultural, political, economic aser meimchir inyakyim ya tzü mopung, arem shirur aser süngtonglitongtem den arok tesendaktep dak sendakba nung ajemdaker bushisüngdangtsüla aser inyakyim tasenba asoshi meimchir taküm dak dang rangloker inyaksangshiba nungi

pilar arok asoshi inyaktsü atema bilemstü nungdaker.

Anungji Environmental Humanities küboki environmental philosophy, environmental history, Ecocriticism, cultural geography aser anthropology, aser political ecology dak sendakba nung tang sensaksema aliba onüktem anioktsüla.

Iba conference nung meimchirtem inyakyim ajanga tajung tamajung adokdaksüba dak sendakba nung eco justice aser sustainability angatetsü atema multidisciplinary methodologies aser approche tem dak rangloker inyaksangshitsü.

Iba sentong nung India aser bendanglen nungi nungtugu scholars aser mongintemi conference omen dak ajemdaker onük balala jembitsü.

Conference nung shilem agitsü atema August 4 nü 9:00 ako nungi tenzüka tenüng züngoksema mapang agitsü.

Assam Rifles-i NSCN (K-Nikki) züngsem kar apu



Dimapur, Rongjui/September 28 (TYO): Dimapur aser Kohima na tsungda NSCN(K-Nikki) züngsem kar senzüsenpongba indang osang tejangja ka angazükba sülen Assam Rifles aser Nagaland Police-i September 27 nü Kohima anasa Mobile Vehicle Check Post ka amenoka liasü.

Meita ataba sülen aonung 7:00 ako shi nung temalen shisema aliba telok nungi züngsem asem pua liasü aser parok ket nungi 0.32 caliber pistol asem aser injang nguteta liasü. Prangbong injang den phone pongu aser gari ka ta police nem bendanga agütsüogo.

Kasa mapang nung Niauxa

yimtsüng nung NSCN (IM) züngsem ka Assam Rifles matsüngdang bendanga agüja liasü.

Iba nisungba ya 2022 küm January ita nungi NSCN (IM) züngsem ka liasü aser pa rakzurakdemba aser tanga oziung alema inyakhshiba ken o nung aitsür liasü.

MOLUNGEN O



JALA LT. MOAJUNGLA
16.06.2013 - 17.09.2023

Onoki kanga meima aliba.

Asur Maojungla (Unger), Mrs & Mr Rongsenshilu jala asuku mapang shirnokisa nubu, rongsen aser sarasadem agi onok nungita yariogo, nenok ajak dang kanga pelaba lemsateper. Nenok temiem mapa tulu onoki kodanga mamatsu. Aser teyanglur Tsungremi nenok takum aser kibong maneni moajang.

Temiem Oja, Oba aser Kinungertem

Kohima nung "Bloom Bazaar" amenoktsü

Kohima, Rongjui/September 28 (TYO): Nagaland nung tang mezüngbuba Investment Development Authority of Nagaland (IDAN)-i ayongzüka, linük yimtiba Kohima kübok old DC Bungalow, "The Heritage" nung 'Bloom Bazaar' lapoktsü renema lir.

Advisor to Chief Minister aser IDAN mendenbuba Abu Metha-i iba bazaar Hokolbarnü 12 ako nung amenoktsütsü aser September 30 nü 5:00 ako nung Nagaland Chief Minister Neiphu Rio-i lapoktsütsü.

September 28 nü osangbenertem den sensaksema mapang Metha-i ashiba agi, iba bazaar ayongzükba nükjidong tongtibangtibaji naro industry ajungkettsü aser state nung floriculture entrepreneur tem nongita yaritsüba atema dang masü saka tanga entrepreneurs aser lokti tentetem nema shilem agidaktsütsü asoshi lir.

Paisa, sentong amenoktsüba sülen Bloom bazaar ya hopta shia Hokolbar aser Honibarnü 12 ako nungi 7 ako tashi lapoktsü, ta ashi.

IDAN mendenbubai ashiba agi, bazaar nung stall 45 alitsü, kong tesemdangertemi naro tapu balala angutsü aser iba den kentenba, art, chiyongtsü, jewellery, fashion aser tanurtem atema stall balala angutsü.

Metha-i, sorkar department 15 aser talisa horticulture, Agriculture, Industries & Commerce, Nagaland Bamboo Mission, Honey Mission amala Agri aser allied sector temi shilem agitsü, ta ashi.

Pai, bazaar nung jurila entrepreneur tem nema parnok indang oset ajungkettsü aser ayoktsü atema maongka agütsütsü ta ashi.

Iba sentong ajanga naro aser entrepreneurship ajungketba dang masü saka Nagaland nung tourism asoshi tejangraba tali kümdaktsütsü imlaba lemsatep.

Taruba hoptatem nung iba ya bendanglen nungi dang masü saka local aser domestic tourist tem atema tongtibang tesem ka akümstü imlar, ta pai ashi.

Mendenbubai ashiba agi, hopta tatem lapokba bazaar ya local tem atema sütoksünema kazütsü asoshi dang masü saka state semdangertem mesüra alima penzürtemi item

anogotem nung state semdangtsü asoshi sentong yanglutsü.

Metha-i, Chief Minister Neiphu Rio teyari den külemi Small Finance, Nagaland Rural Bank aser Bank of Baroda amala financial institution tem den longjemer IDAN-i September 30 nü Bloom Bazaar lapokba mapang Floriculture Scheme ka amenoktsütsü, ta ashi.

Pai ashiba agi, IDAN-i naro metsürtem jangjatsü merangdar aser parnok nem loan agütsütsü.

Iba scheme kübok naro metsürtem-i tangar dang nungi tetemlok tajemba agütsütsü aser collateral aser long term moratoriums malitsü, ta pai ashi.

Pai ashiba agi, iba scheme nükjidongji naro industry ajungkettsü asoshi lir, ajita asünung floriculture industry ajanga state rongsenketzüng ajungkettsütsü, ta ashi.

Naga nung ter tsürtem dang masü saka naro metsütsü jangrarterem noklang aser meyirejang aika pei kidang nungi naro yoka sen aartem aika lir, ta mendenbubai ashiba den IDAN-i parnok ya professional kümdaktsüner aser inyakyim tajungtiba aser industry indang minimum standard bener arua parnok shishilembaba ajungkettsüner, ajita asünungdang Nagaland nung tsünütetba naro tem ya künübo National jenjang dang masü saka international jenjang tongtettsü, ta ashi.

Iba dak sendakba nung Metha-i, Naga nung ter talisa tetsürtemi iba ya inyaktetsü ta temulung lema bilemba lemsatep

Pai ashiba agi, IDAN-i National aser International company tem den longjemer metsü tajungba bener arutsü aser iba den iba sector nung capacity building exercises, workshops and seminars tem agütsütsü asoshi inyaktepar.

IDAN-i bushisüngdangba indang lemsatepba mapang Metha-i ashiba agi, Bloom Bazaar 2023 ya tenzükür külen iba ajanga weekend employment 450 aser permanent employment 300 dak tema adokdaksütsü.

Maneni IDAN mendenbubai ashiba agi, Nagaland sorkari Bloom Bazaar atema sen lakh 40 sanction süogo.



September 28, 2023 nü New Delhi nung Road Transport & Highways Union Minister, Nitin Gadkari aser Union Minister of State for Road Transport & Highways, V.K. Singh nati osangbenertem den jembidang tangokba noksa nung angur.

EAM Jaishankar-i US National Security Advisor, Sullivan ajuru

Washington, September 28 (Agencies): Brihostibarnü India External Affairs Minister, S Jaishankar-i US National Security Advisor (NSA), Sullivan ajurua senden amendang tenati linük ana tsüingda tesendaktep tsütsü terenlok atema o lemtep.

Bodhbarnü Jaishankar New York nungi Washington-i a arua liasü. New York nung Jaishankar-i 78 buba United Nations General Assembly nung jembia liasü.

Jaishankar- X ajanga, "Washington DC semdanga mezüing NSA @JakeSullivan46 den senden amen. Taküm asen linük ana tsüingda tesendaktep tsütsü terenlok kanga aliba asadangogo aser maneni tajungba akümtsü atema

jembio," ta metetdaksü.

Jaishankar-isa nikongdang US Secretary of State, Anthony Blinken ajuru. Pai US Trade Representative, Katherine Tie-a ajurutsü.

Tawa New Delhi nung G-20 senden amenba sülenbo tang mezüing US o India na tsüingda temaba jenjang nung senden amener.

Tang India aser Canada na tsüingda tesendaktep raksar lia Jaishankar-i US kettangsertem ajurua senden amener. US-i India dang taküm June ita nung British Columbia nung Khalistani lenir, Hardeep Singh Nijjar tepsetba bushisüingdangba maparen nung Canada den yaritepdaktsüner, ta ajungshir.

Tawa Canada Ato kilonser, Justin Trudeau-i, Nijjar

tepsetba nung India sorkari shilem agia alitsüa akok, ta jembiba sülen linük ana tsüingda tesendaktep mejungi lir.

Jaishankar-isa Joe Biden-i aniba administration nung tongti kettangsertem aika ajurutsü aser iba mapang nungji taküm June ita nung Ato kilonser Narendra Modi-i US semdangba sülen linük ana tesendaktep koba tashi renlokerar asadangtsü.

Jaishankar-isa US nung aliba India nungersensotem, think-tanks nungi züingsemtem aser corporate sector nung lenirtem ajurutsü tebilemba lir.

Jaishankar-i September 22-30 anogotem nung US semdangba mapang 4buba World Culture Festival nunga jembitsü. Iba sentong ya Art of Living-i ayongzük.

October 1 nü Tamil Nadu nung Medical camp 1,000 agitsü

Chennai, September 28 (Agencies): Tamil Nadu Health Minister, M Subramanian-i, October 1 nü state tesem balala nung special medical camp 1,000 agitsü; dengue aser mongpu wara anema raratsü atema medical camps ayongzüker, ta metedaktsü.

Osangbenertem den jembidang Minister Subramanian-i, tzüingluruwa mongpu tenzüikba mapang nungi tenzüika Tirunelveli, Sengalpattu, Cuddalore, aser Kancheepuram densema district aika nung mongpu wara agi shirangba manener, ta metedaktsü.

"Dengue aser mongpu wara nokdangtsü atema onoki October 1 nü linük tesem ajaklen medical camps 1000 ayongzükogo," ta pai metedaktsü.

Iba dak alia medical teams-i state tesem ajaklen mongpu wara indang awareness agütsüdar; mobile medical team 476-i awareness sentong nung shilem agir.

Iba denji külemi RBSK mobile medical team 805 dang awareness camps agitsü aser state tesem ajaklen kaketshirtem nem treatment agüjang, ta tuyuogo.

School administrators danga kaketshirtem rongnung dengue lira anasatiba Primary Health Centres den tongtepratepang, ta tuyuogo.

"School tem dang school temeket merüka ayutsü aser tzü atsüingdena aliba indoktsü metedaktsüogo, kechiyong tzü atsüingdena alidak 'Aedes' ta ajaba merla pokteter," ta Health Minister-isa metedaktsü.

September 16 nüa state chief secretary leniba nung senden ka mena state nung dengue aer mongpu wara nokdangtsü atema o lemtepa liasü, ta minister-isa metedaktsü.



September 28, 2023 nü New Delhi nung Gunners Day anogomong nung taoba mapang Army tongti, Gen. (ret.) Deepak Kapoor-i (ajichilen nungi tanabuba) National War Memorial nung nara toktsüba sülen salem agütsüadang tangokba noksa nung angur.

Jharkhand state nung IED ka apokba lendong nung CRPF sepai ka asü

Ranchi, September 28 (Agencies): Brihostibarnü Jharkhand state kübok Tambahaka aser Sarjomburu yimtsüing na tsüingda arem nung Maoists telungpurtemi Improved Explosive Device (IED) ka pokdaksüba lendong nung Central Reserve Police Force (CRPF) Cobra Battalion 209 nungi sepai ka asü aser ka yiru.

Iba region nung Maoists telungpurtem mita aoba mapang nung IED bomb apokba lendong nung Inspector Bhupender aser Constable Rajesh na yirua liasü. Tenaprong tayimtsü ajanga Ranchi nung aliba

hospital-i anir oa liasü, ajisüaka Constable Rajesh bo asü aser Inspector Bhupender bo tang tajungba lir.

Jharkhand Police IG (Operations), Amol Vinukant Homkar-i, "Tanü Maoists telungpurtemi IED ka pokdaksüba lendong nung CoBRA 209 nungi sepai ana yirua liasü. Inspector Bhupender aser Constable Rajesh na yirua helicopter ka ajanga Ranchi-i anir ao. Tena treatment agidang Rajesh mekümsükteti asü aser Bhupender bo tajungba lir. Iba tesem nung sepaitemi maneni telungpurtem mita odar," ta metedaktsü.

Green Revolution tebuti, MS Swaminathan süogo



Chennai, September 28, 2023: Nüingtugu agricultural scientist aser India nung 'Green Revolution' nung tongti shilem agisang, M S Swaminathan Brihostibarnü alima nungi pilaogo; pa arrshi küm 98 liasü.

Chennai, Rongjui/September 28 (Agencies): India nung kanga nüingtugu scientist, MS Swaminathan, shiba dang India nung 'Green Revolution' tebuti ta ajar; pa Brihostibarnü alima nungi pilaogo; pa arrshi küm 98 liasü.

Green Revolution kübok alu nung tsük tapu balala jenti züsendaktsüetba ajanga India nung aluyimertem kanga tajangzük ngudaktsüba nung pai tongti shilem agia liasü.

2019 küm interview ka nung jembidang Swaminathan-i, "Kü dang 'Father of Green Revolution' ta ajar, ajisüaka yamaji asütsüsa ni meinyak. Ni teti agia, 'ni tetsür tajung asem tebu' ta ashir," ta metedakja liasü.

Taküm alitsü atema aluyimba nung tuluba metaloker aliba India ama linük ka nung tsük aser wheat tsük tapu balala jenti züsendaktsütsü atema MS Swaminathan-i kanga meranga inyaka liasü. Nütsüing kanga renlokba den külemi aluyimertem chiyungtsü security tsütsü timtem kanga ajangshiba mapang ka nung pai aluyimertem income ajungkettsütsü atema inyak.

Iba mapatong ya tanabuba Five Year Plan (1956 - 1961) nung tenzüker aser ibaji ajanga India nung ayaba tebilemstü koktettsüsa yari. Alima nung ayawara tamajungtiba- 1943 küm Bengal Famine sülen India nungertem kanga timtemba mapang nung alu nung aika züsentetstü atema pai tongti shilem agia liasü.

Swaminathan-isa aluyimertem dang metsühjang tajung amshiba ajanga tajangzük koma angur, iba tesayuba agütsüba tsütsü tasen aika purapiteta sayu. Tatishitsü agi, 1966 küm pai Delhi tezülen yimtsüingtem nung model farm 2,000 lapoka aluyimba tasa balala amshiba ajanga jenti züsentetstü tesayuba agüja liasü.

Pai aluyimertem den indangindanga jembiba ajanga alu nungi jenti züsentetba dang masü saka scientific tsütsü aluyimbaren nung terenlok kanga liasü aser azüing-züluba memetetba ajanga tetsükdaktsü aika ajangshiba pai lemsatetp.

Pai meranga inyakba ajanga aluyimba mongpu pezü nung wheat 12 million ton züsenteta aliba nungi 23 million tons züsentet aser ibaji ajanga India nungeri tsük alizüktsü atema tanga linük dak metaloka aliba anenadok.

Tesülen pai taoba mapang Ato kilonser, Indira Gandhi den külemi inyaksema aluyimba tsütsü mapatong balala renema liasü.

Pa 1979 nungi 1982 küm tashi Principal Secretary of Ministry of Agriculture inyaka liasü aser 1980 nungi 1982 küm tashi India Planning Commission agriculture & rural development nung incharge inyaka liasü. 1982 küm pa Phillipines nung aliba International Rice Research Institute nunga Director General inyak.



TIR YIMYIM YIMOBILEM (EDITORIAL)

DIMAPUR ROGONÜ, RONGJUI (SEPTEMBER) 29, 2023

Police-tem melenshitsü tenzüker

Tang Nagaland nung osang tajung kaji Nagaland police-tem rongnung yi aser mozümora lar kümer alirtem taküm melenshitsü atema mapang agüja Nagaland DGP-i anir anepaluba ya asütsü. Atangji, machimajemtsü chia ajemer aser ozüng raksartem azüoktsü asoshi shimba mitkartemang yi aser mozümora lar kümra iba limajibo tesamalen a aer. Aji oda, Nagaland government kübok nübortem asoshi tajung inyaktsü tentetba department-tem rongnung kata yabo junger ta asütsüsa mali kuma omaba mapang, Nagaland police-tem libaliro yimya tamajungtem tama melenshitsü tenzükbaji Nagaland tajung kuma arutsü tenzükbaji mapang ka asütsü. Nagaland ya alinük tilaka dang aser nütsünga tangar yimti ka nütsünga masü, kanga ishika dang, anungji tamajung agi sünga liaka, tajung kuma melenshinüra aser melenshidaktsünüra melamelaa tajungba kuma melenshitsü aser melenshidaktsütsü koka lir. Ajisüaka, tang Nagaland majung akümba yabo asenoki asenok tajung kuma memelenshinüba agi tamajungba akümerba dang lir. Aji oda, temelenshiji temaba nungi tulubai anir tenzüker nung dang teküpbok alir tilartema melamelaa melenshiyonga aotsüsa nisung meimchir yimya dak keta alinungji, tang Nagaland Police nung tuluba DGP-i anir Nagaland police-tem melenshidaktsütsü sentong tenzükbaji yagi police-tem rongnung dang masü saka Nagaland tesem ajaklen temelenshi tajung tenzükbaji angutsü imlar. Aiben Nagaland nung tematiba office Civil Secretariat nung dena inyaktertem dang mapai mapang shitak nung arutsü aser mapang shitak nung aotsü ozüng agütsüba angur, ajisüaka department shia nung tokolak purtemi mapang shitak mamshira koda asütsü? Kasaji, yimten aser lokti senden nung lenirtemi nübortem dang ochishia alitsü ajungshir, ajisüaka lenirtem jagi ochishia melitetra koma asütsü? Ibaji mesüka Nagaland police-tem dang tanishirtemi ozüngi memelaba mapatem meinyaktsü aser achi-ajem masütsü ozüng agütsüaka, tanishirtemiang jemra, chira aser yokra koda asütsü? Aji oda, tilartem dang mapa shitak inyaktsübo ajungshir, saka parnok meyong chiyongtsü aser süoshi nungi alepzüka chitsür ta süra, parnokia kechi bilemetsü? Kasaji, tulartemi tilartem dang pei tetsü taso lima meima pei mapa nung temulung agüja inyaktsübo ajungshir, saka parnokji anogo shia alulen aser kisülen dang senzüdaktsüra koda sütsü? Tanübo Nagaland majungba ya tulartemi tilartem aitsür aser tilartem tulartem aitsür, kechiyong shibaibo tamajung aginütsü? Ajisüaka, shitakba Nagaland melenshidi süra Nagaland-bo temalen nungi melenshia alu nung dang ajungtsü. Aji oda, tang DGP-i par sepai telok melenshitsü atema ozünga shitak amshir, temeima sayur aser teyaria agütsür ta tenzükbaji ama, Nagaland nung department shia nung tokolakbai anir ochi ashi tenzüker nung dang Nagaland ochishir lima akümetsü. Pei lima tajung kuma melenshidaktsütsü atema pei tama melenshitsü nungdaker, anungji pei lima aser pei nübortem tajung kuma melenshidaktsütsü atema lenirtemi tim masübalen nungi senotsü machi aser magi aremetsüla. Kasaji election nung toktepertemia ochimashi aser tashiyim agi adoktsü agibo ochi aser teindang mapa inyakba ajanga madokba takoksa-ang aremetsüla. Alima nung pei akok apia teinyaknütsü inyaktsü, pei chinütsü jemnütsü chia ajemtsü aser taginütsü ajak bendentsü ta asüba agi temelenshi tajung bener marutsü. Tanü asen lima nung ochi aser asentenshi nungdakba indang jembirtemji ochimashir aser Tsüngrema aser nisunga metsüburtem lir, iba jagi asen lima memelenshir. Tanü Nagaland police purtem rongnung machimajemtsü chia ajemba dang masü saka itemji shibelenba shisabolu aser timtemji parnokki yangluba timtem masü saka asenok tanishirtemi yangluba timtem aser shisabolu khuret lir, anungji tanishirtemi anir pei jakla melenshitsüla. Kena Naga nungger tia ajung, tsümar ka Nagaland arükhudong akümba agi, Naga nungger chiajemer police aika taküm dang masü tanela dena kümzüktsü imlar.

OLEMSABANG

MISSION TO THE NAGAS ASER OKADAK AROGO OTSÜ TEMETEN BUSHIBA: OSEMLOK

~ Mar Longkümer

Walu Walling aser Wati Longchar tenati agüja aliba onük nung Molungkimong, Molungyimsen aser ABAM indang parnok YSS nung zülutepba nungi tongtibang onük ishika agiteta Tir Yimyim nung anogo 4 nü adokba jangratema aser tasüngdangtsü aika dena züngogo. Anungji mezüngbuba nung ibai tena tangatetba masü saka parnok YSS nung zülutepba nungi ta tenati ashi nung idakji tena dang pelatsü mesüra jashitsü kecha madoker ta bilema züngogo. YSS tetezü kechi ta ni Pastor kar dang asüngdang nung parnokki Yanglushidi Sensaksem Sabang ta ashi. Anungji ni ama rataseta alir ajaki YSS tetezüji tamasa angateta yudi

Tanabuba nung "Rishikangshi aser Medangdangi" ocet ka nungbo Kari Longchara densemer par aseme züluba YSS nung azüng. Saka kasa ocetji Nokinketer WhatsApp nungbo Walu Walling aser Kari Longchar tenüng maden Wati Longchar tenüng kisüng adoka angu nung idakji timtem kar liasü südi ta bilema züngogo. Par aseme dang ajibo metet. Anungji item ocet nungi mangatetba aser teratabatem kar lemsateper.

Mezüngbuba nung tenati Molungyimsenarogoi Jubilee sendakba ken-o nung ABAM Sanen Luden den telemteba tajung aginüa aiben asüngdang aser Central Council nunga küm ana tashi jembinüa mapang meshi saka memela ta ashibaji kechiba memela aji ABAMi kuli tejangja amangbapurtem dang sayutsüla. Molungyimsen arogoi küm ana tashi mepishir magizükba kechi tai ajanga ta iba ocet azünger aikati bilemer. Anungji parnokki mepishir mapang memelara parnok atema Court-ji dang ato? ta asübaji aikati hau ta agizüker.

Ano 1986 küm Special Committee reportji tatembang asü masü ta asüngdangbaji angazükba agi iba tensa nungji Aor Laishir takutet nisung: Prof. Dr. Renty Keitzar, Rev. Dr. I Ben Wati, aser Rev. Dr. K. Imo Aier par asem den Ao Mungdang otsü meteter tsüraburtem iba Special Committee nung züngsem ser parnokki 1982 nungi 1986 tashi nung ngutetba dak ajemdaker osang agütsüba ama ABAM Central Council-i agizükba dakji talila ano kechi tebushiloktsü ali ta tazüngertemi asüngdang. Arogo otsü sendakba asünung court-i maotsü parnokki ashibaji shitak ta angateter, saka küm ana tashi iba ken-o jembitsü mepishir ABAMi mapang magütsü nungji Molungyimsen nunggerjia asenoki maitsütetsü ta tip kelenbo bilemer.

1872 December 22 Naga tenem nung mezüngbuba nisung 15 baptia Kibuba Benjong achibaji Molungkimongji lir. Aji shingaia nunga ta meshitetsü. Ya Naga Khristantem ajak atema melenshitsü makokba ochi o lir. Anungji kokra Molungkimong yimdakji Naga nungger arogo ajak lungjemer lung tulu talangka nung par 15 Rev. Dr. Clark ajanga tzü nung baptisübaji zulu tululu agi zülur azünga ayutsüla. Iba sülen December 23, 1872 - October 24, 1876 tashi nung Molungkimong nungji Khristantem tamang indang tezüluba kuli karbo ali asü mali ta ajia bilemdangtsü nungdak. Akhi Ao anem mapang ya atalok asünung yimya sübaa aruba ka khenyongi melenshitsübaji kanga temelabo masütsü südi. Nisung 15 baptiba jakdanga parnok 9 Sibasagar nung Rev. Dr. Clarki baptiba aser Clark anir atutsü nokinketer par 60 alubaji Molung nungger dang liasü. Anungji Molungyimsenjia mezüngbo Molung nunggeri dang akümba ta angateter. Rev. Dr. Clarki Naga arogo osang agütsüba nung joko tamanger pa den nisung 10 dang kümogo aser parnokki kü den yim tasen akümba nungji lir ta Home Board dangi osang yokba par 10 tenüngji Molungyimsen arogoi agütsütetsüla ta bilemer.

Ashiba ama December 23, 1872 nungi October 24, 1876 nungji tepela tejashi ajakji Molung nungger rongnung dang atalok ta angateter. Kodang yimsü tasenji Molungkimong nung sadema muotetsüsa aküm idangji angazükba agi Rev. Dr. Clark-i pa temba Wanlai dangi Tamlui aotsü bilem, ano Godhulaibo Merangkongi tunüa ashi nung Rev. Dr. Clarki hai ta langzü. Saka Molung nungger rongnung iba yimsü tajung ya Molung lushi nungi bener yoktsü mumolung nung parnokki Rev. Dr. Clark dang Molungkimong nungi mile ishika lur Molungkong nung yim tasenji akümetsü asüngdang nung paia hai ta langzü. Parnok ibaji renema jembirang Godhula Merangkong nunggeri hai ta langzüba osangji bener alu.

Ano Merangkong Baptist Arogo Otsü, 1980, page 143-144 nung 1886 Merangkongi Molungkimong amak ta zülua angur, aser Molungkimong nungji küm ishika shinga maliasü. Molungkimong nunggerji temuket yimtem nung küm ishikaji lirang asentenshia yimji kümshir ali ta otsü nungji angateter. Süra küm ishikaji Molungkimong nung arogoji liasüa ta meshitetsü. Yim tanaben kümshir ang Molungkimong Baptist arogo tenzüker, saka ajia küm ishika dang lirbo missionarytemi shibangtsü aser iba sülenjiang Molungkimong Baptist arogo tenzükbaji metangdangi aru ta angazüker.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Samaritan's Purse-i Airlift response center ka semzükogo



Greensboro, North Carolina nung Purse Airlift Response Center aser kima Samaritan's Purse indang tayimtsü tasenba- Boeing 757 noksa nung angur.

September 28, 2023: Samaritan's Purse-i North Carolina nung airlift response center tasen ka aser cargo aircraft ka semzükogo; alima nung tzü-mopung dak sendakba lendong balala nung mapang shidak nung takoksa angurtem Yisu Khrista tenü nung yaritsü nükjidong nung parnoki center tasen ya semzük.

Mongolbarnü (September 26) Samaritan's Purse-i Greensboro nung 62,000-square-foot nung yangluba Airlift Response Center semzük. Iba facility ya Piedmont Triad International Airport nung lir aser iba center ya Boone nung aliba Samaritan's Purse indang headquarters nungi mile 100 shi pilar lir.

Mongolbarnü agiba sentong nungji nisung 300 dak tema aden. Samaritan's Purse indang Boeing 757 tayimtsü service tenzükli iba center semzük.

Iba facility nung pilots, tayimtsü engineers, load masters, maintenance sepaitem aser staff tem densema nisung 24 dak tema lir.

Interview ka nung jembidang Samaritan's Purse CEO, Rev. Franklin Graham-i, Airlift Response Center ya heavy duty tayimtsü

anepalutsü atema lir, aser iba ya ozü organization atema kanga tongtibang, ta metetdaksü.

"Greensboro Airlift Response Center aser khu abenba tayimtsü ana atema onoki Tsüngrem dang pelar. Iba ya ajanga Yisu Khrista tenü nung onoki nüngdakba mapa aika inyaktettsü," ta Graham-i metetdaksü.

Iba facility ajanga Samaritan's Purse-i alima tesem mashie ka nung lendong mapang nung mapang tatsütiba nung teyari agütsütettsü, ta paisa metetdaksü.

"Lendong atalokdang ghonda 12 tsüngda onoki tayimtsü nung field hospital atema osettsüset ajak oshiteta apusotettsü," ta pai metetdaksü.

Nüngtugu sayutsüngir, (asür) Billy Graham'er jabaso Franklin-isa, "Airlift Response Center amenoktsü atema onoki tesüiba küm pongu dak tali inyaka liasü," ta ashi.

"Climate change dak sendakba lendong balala aser COVID-19 ama wara balala ano ajurutsü. Koma ka kera onoki teyari agütsüdir yamaji tajungba dang. Onoki takütem kümzükner, anungji akokba tashi tekara nung inyaksüla," ta pai ashi.

Graham-i, airlift center tasenba ya küm ka tejaklen renema liasü. Iba centre design atema Samaritan's

Purse-i küm ka ser tesadang mapang agia liasü.

Samaritan's Purse indang khu abenba tayimtsü tulutiba anaji Boeing 757 aser tamalen nungi amshia aliba Douglas DC-8 na lir.

Samaritan's Purse-i Douglas DC-8 tayimtsü ya küm tenet dak tema amshio. Iba tayimtsü ajanga mapang balala nung (185 ben senzüdang) linük ter dak temai khu touzük pound million 8 jungnüa belenogo.

Tawa iba tayimtsü ya Ukraine-i 41 ben aodang field hospital ka belen aser timtemertem nem teyari agütsütsü atema osettsüset/chiyungtsü pound 1.5 dak tema belena liasü.

"Onok indang tayimtsü tanabuba ya Boeing 757. Iba tayimtsü atema küm ka ser tesadang agia liasü, kechiyong onoki [Federal Aviation Administration nungi] temelaba nüngdaka liasü. FAA nungi temelaba angutsü atema mapang talangka agi," ta paisa metetdaksü.

Boeing 757 tayimtsü mezüngbuba mission ji tan ita tetenzüklen tenzuka liasü. Iba tayimtsü nung khu touzük ton 24 bener merok-mi lendong atalokba Maui, Hawaii-i oa liasü.

Samaritan's Purse-i, Boeing 757 nung khu pound 67,000 tashi bentettsü, ta metetdaksü.

PM-i Amongnü 'cleanliness drive' ayongzükba onoki aitsür: TBCA

Ukhrul, September 28 (Agencies): Tangkhul Baptist Churches Association (TBCA)-i Ato kilonseri Amongnü 'Mapang Ka, Ghonda Ka, Ajak Longjemer' omen nung ajemdaker ayongzükba cleanliness drive ji onoki aitsür, ta metetdaksü.

TBCA conference hall, Mission compound Alungtang, Ukhrul nung osangbenertem senden ka nung jembidang Education Secretary TBCA, Rev. Dr. Thanshang Horam-i,

Tangkhul nung Khristantemi 'Swachh Bharat Abhiyan' sentongji pelaa agizüker, ajisüaka Ato kilonser, Narendra Modi-i Amongnü nübodoka mapa inyaksü atema ayongzükba onoki ashishir, ta metetdaksü.

"Iba ya onok indang temeshi tekülem anogo anema inyakba mapa ka lir," ta pai ashi.

Gandhi Jayanti anogo (Oct. 2) atongtsü anogo ka jelia 'cleanliness drive' ayongzükba ashishia pai, BJP-i aniba Centre

sorkari linük nung minorities anema inyaka atema tasüngdangba aka.

Ano külen finance secretary TBCA, Rev. VA Ayo-i, Tangkhul Baptist Churches Association den affiliate süa aliba Arogo ajak dang iba sentong nung shilem magitsü metetdaksü, ajisüaka Arogotemi nübodoka mapa inyaksü atema pei Arogo sasep nung tanga anogo ka dang shima nübodoka mapa inyaksü metetdaksü.

ANOGO ABEN TSÜNGREM DEN

TSÜNGREM SENMANGERTEM

"Aser nenok Khrista nübur mesü, ajangla nenok Abrahan metsü, tenangzükba amato nenok senmangertem lir. Gal 3:29

Kibubai Pa senmangertem asoshi inyaker. Levi kidong dak alaka tangar ajak tenangzükba lima nung alinük balala parnok shilem angu. Iba temo limaji tsünüsembongba nungi tajung jenti adokdak, yangji tangar jangratema alidang, Levi kidongbo ali linük tila kata mata, saka Tsüngremji parnok senmang asünung, Tsüngremi parnok mesü. Nüburtemi tenla bener arutsüba parnok achi, parnok shisabulutsü kecha malitsü, kibubaji Sannüker tajung, anungji Pai parnok ani.

Tsüngremi asenok anepalur, asen nüngdak ajak Pai agütsür, Pai asenok dak sakloker, Kotak azüngtsü agi Pai asenok mesür. Yamaji Pai Pa senmangertem anepalur. Na Tsüngrem senmanger asü? Tsüngrem O-i ashir, asenok Khrista nübur süra, asenok senmangertem lir.

Asenok alima meyong asü Khrista meyong? Shirnok Khrista meyong parnokji Pa nübur aser Tsüngrem senmangertem lir.

SARASADEM:

Kü Tsüngrem! Ni alima meyong masü, Khrista meyong lir; Khrista den anogoshia jajadi. Amen.

MP nung Hindu nunger telok kati Khristan school kima longkak ait

September 28, 2023: Madhya Pradesh state nung Hindu yimsü alia amanger telok ka Khristan school kati aoba sülen longkak aita, 'school ketdangsertemi Hindu nunger Tsüngrem mezüngmeshir', ta tai tongloksü aser police-i school Principal anema bushisüngdangtsüla, ta takhangba agütsü.

Madhya Pradesh nung Sagar district kübok Deori nung aliba At Mary's Convent School nung principal, Sister Sarita Joseph-i, "Iba ya ozü school anema asalentong yanglur inyakba asütsüa akok," ta ashi.

September 26, 2023 nü Hindu nunger loktiji school kikümbang anasa adenshi. School notice board nung Hindu nunger Tsüngrem Ganesh noksa ka agientsüba anema parnoki longkak ait.

Longkak aiterterem rongnung karibo tashiyim amshia principal office telungi ia Principal dang asüngdangya tenzuka liasü.

Longkak aiterteremi maneni yimyim ayimba mapang school staff temi police teyari meshi. Hindu nungertem jagi police dang principal anema

bushisüngdangtsü aser sorkari iba school recognize süa alibaji agientsüla, ta takhangba agütsü.

Iba school ya Eastern Rite Syro-Malabar Church kübok Congregation of Jesus (CJ)-i lapoka achaayangba school lir. Police-i longkak aiterterem dang, onoki iba tatalokba jungjunga bushisüngdangtsü, ta nangzükba sülen ang longkak aiterteremji pakshia liasü.

September 28 nü osangbener den jembidang principal-i, "Iba ya tiyazü nung onok nem tai tongloksüba lir," ta metetdaksü.

Laisa, school-i tamangba yimsü balala indang benjung ajak amonger aser tamangba yimsü mesüra kin nung ajemdaker shinga mebedanger, ta metetdaksü.

State yimtiba, Bhopal nung aliba Khristan lenir, Daniel John-i, iba tatalokba ya tanga kecha masü saka school aser Khristantem tenü nung menüksütsü nükjidong nung inyakba lir, ta ashi.

Madhya Pradesh nung nütsüng million 72 lir aser iba nungjagi nütsüng shilem 0.29 dang Khristantem lir.

AO OSHI ANGAZÜKDAK:

TANÜ ANGAZÜKTSÜBA OJANG



Sang

(n) arem shiruru aser ozüsangnung aputsü yangluba (trap)
* Arem nung sang yanglua yutsübaji nisungtem asoshia lendong lir.

Sang

(v) inyakang ta ashiba (do it)
* Kiburi sang ta ashiba ama parnoki inyak.

OLONG PAITEP # 6651

15x15 crossword grid with numbers 1-19 indicating starting points for clues.

TIPILEN

- 2. Teburtemi tejak nung awaba - (8)
6. T ___ em - (3)
8. Tzüik ayudak - (3)
9. Nüngdakba dang timba - (6)
11. Züina ao - (4)
12. Yangi tzu angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6650 TELANGZÜBA

TIPILEN :

- 1. Telok, 4. Aluru, 6. Ozüng,
8. Emk, 9. Kin, 10. Teti,
12. Süir, 13. Jen, 14. Ola,
16. Talak, 17. Mazük.

LANGTSÜNGLEN :

- 1. Tenükjang, 2. Luden,
3. Kiochtsü, 5. Lenti,
7. Tajangzük, 11. Teronem,
12. Sempa, 13. Jahaz.

NAI-A YA METETTER MA

KIJAI ZÜLUBA KAKET MILLION 100 DAK TEMA AYOKBATEM KAR:



- A Tale of Two Cities: Charles Dickens
The Little Prince (Le Petit Prince): Antoine de Saint-Exupéry
Harry Potter and the Philosopher's Stone: J. K. Rowling
And Then There Were None: Agatha Christie
Dream of the Red Chamber : Cao Xueqin
The Hobbit: J. R. R. Tolkien

Manipur: Imphal valley nung DC office raksatsü



Brehostibarnü Imphal West deputy commissioner (DC) indang office nisung telok kati raksatsüba ajanga securitytem akangshia anükba noksa angur.

Imphal, Rongjui/September 28 (Agencies): Meitei nunger kaketshir ana tepsetba dak sendakba nung longkak aitba tesashiba küma aoba mapang Manipur kübok Imphal valley ajunga nung tensa tamajungba küma odar.

Brehostibarnü Imphal West deputy commissioner (DC) indang office nisung telok kati raksaja liasü.

Iba den bendenloksema item nisungtem yagi gari ana rongtoktsüogo, ta ketdangsurtemi ashibaPTI sangdong ka ajanga metetdaksü.

Central reserve police force (CRPF) personnel temi tensa aziüoka liasü, ta kasa sangdong ajanga metetdaksü.

Manipur kübok lenden nung longkak aiterem aser security personnel tem tsüingda anogo asemubba mangatetep adoka arudar.

Bodhbar aonung longkak aiterem aser security personnel tem tsüingda Uripok, Yaiskul, Sagolband aser Tera tesemtem nung mangatetep adoka liasü.

Security forces-i longkak aiterem mintoka tensa aziüktsü atema teargas shells ishika khalokja liasü.

Maneni Manipur kübok lenden nung longkak aiteremi tyre tem arongba den long aser merang pipe amshia tongtibang lenmangtem nokdangogo.

Security personnel tem nüburtem aliba tesemtemi maitdaksütsü atema parnoki iba jenjang agia liasü.

Taoba ghonda 24 tsüingda Manipur nung longkak aiteremi

Bharatiya Janata Party (BJP) indang office ana tashi rongtoktsüogo.

Longkak aiteremi rongtoktsüba BJP office anaprongla ya Manipur kübok Thoubal district nung amenoka liasü.

Longkak aiteremi Thoubal district nung BJP mandal office ka Bodhbarnü rontoktsü aser ano kasa district kübok Wangjing tesem nung amenoka aliba party indang office tanga ka longkak aiteremi maka liasü.

Kuki nunger telungpurtem asütsü ta temulung melemi bilemertemi Meitei nunger kaketshir ana tepsetba sülen Manipur kübok lenden nung nüburtemi longkak aita arudar.

Kasa mapang nung taoba mapang Manipur nung police temi longkak aiterem dak tashiyim tali amshiba atema parnok aitsüogo.

Taoba anogo ka ana tsüingda Manipur police-i longkak aita aliba kaketshirtem aziüktsü atema tashiyim amshiba atema lokti tentet balala aser yimden yimsüsürtemi police aitsüogo.

Manipur police-i ashiba agi, parnoki takokba tashi tashiyim mamshir, saka video tem ajanga parnoki tashiyim amshiba kuli agütsür.

Manipur nung police aser tanga armed force temi longkak aita aliba kaketshirtem senshidaksütsü atema tear gas amshiba den lathi agi züka meinshiba video tem aika temai adokogo.

Manipur nung longkak aita aliba kaketshirtem ya timba

school tanurtem lir.

Kaketshirtem aziüktsü atema police temi tashiyim amshiba indang jembiba mapang Manipur BJP MLA Rajkumar Imo Singh-i, parnok inyakim ya aitsüogo.

"Armed force temi tashiyim amshiba ni aitsür.. Iba amala kanga dang kümdanga achaayangtsüba tensa ka achaayangba mapang kanga azüzüka inyaksangshitsü atema armed force tem nem tetuyuba agütsütsüla," ta Manipur BJP MLA Rajkumar Imo Singh-i ashi.

Paisa, kaketshirtem aziükba mapang tashiyim amshiba armed forces personnel tem temzüng ozüing dak ajemdaker merenshitsü khanga liasü.

"Ni Manipur nunger adianutem dang mepetmesü adokdaksütsüsa inyakim kecha nunga shilem magütsü mepeshir. Longka aitba sentongtem ajak yimjung nung agütsü nüngdaker," ta pai ashi.

Paisa, "Asür kaketshir nem ochi obendang agütsütsü atema asenoki inyakti. Kaketshirtem tepsetertem pua anogo ishika tsüingda ochi obendang agütsütsü atema inyakti," ta ashi.

Maneni Rajkumar Imo Singh-i, "CBI-i taruba anogo ishika tsüingda ochi obendang magütsütetera asenoki Delhi nung mena jenjang tasen ka agütsü asoshi inyaktepti," ta ashi.

Ano Bodhbarnü Congress MP Gaurav Gogoi-ia longkak aita aliba kaketshirtem aziüktsü atema tashiyim amshiba atema Manipur police aitsüogo.

Meghalaya: KHADC nem Centre-i sen crore 200 agütsütsü

Shillong, Rongjui/September 28 (Agencies):

Meghalaya nung Khasi Hills Autonomous District Council (KHADC)-i Centre nungi sen crore 200 agizüktsü renema lir.

Tied aser untied grant kübok 15th finance commission ajanga Meghalaya nung KHADC-i Centre nungi sen crore 200

agizüktsü.

Iba sen ya Centre-i state nung Durga Puja holiday matong tsüingda agütsütsü imlar.

Iba osang ya KHADC indang chief executive member (CEM) Pyniaid Sing Syiem-i Bodhbarnü metetdakja liasü.

Maneni Meghalaya sorkari minor minerals dak sendakba

nung royalty shilem ka ama KHADC nem sen crore 14 agütsüogo, ta paisa shisem.

"Transport department-i bendenba saru aser major minerals indang royalty nungi onok shilem ano sen crore 30 agizüktsü imlar," ta Meghalaya nung KHADC CEM-isa metetdaksü.

Pathsala nung tatsük mati kaketshir 24 süjia ao

Pathsala, Rongjui/September 28 (Agencies):

Assam kübok Pathsala nung Brehostibarnü anü kanga tatsük asüba ajanga kaketshir 24 tashi süjia oa liasü.

Item kaketshirtem ya Pathsala nung Saderi yimtsüing kübok Sawhid Madan Rauta

High School nungi liasü.

Brehostibar anepdang sarasadem mapang agiba mapang kaketshirtem ya süjia oa liasü.

Osang ajanga ashiba agi, school nung anepdang sarasadem mapang agi dang anü kanga tatsük asüba ajanga

kaketshirtem süjia oa liasü.

Kaketshirtem ya temang anepalutsü atema Pathsala kübok Sawhid Madan Rauta hospital-i anir oa liasü.

Google weather report ajanga Pathsala nung Brehostibarnü temperature ya 38°C liasü ta sayuogo.

Taiwan-i China den toktepa submarine tasen ka yangluogo



Taiwan kübok rongnendak Kaohsiung yimti nung Brehostibarnü iba submarine ya Taiwan Tir Tsai Ing-wen-i sayaja liasü.

Kaohsiung, Rongjui/Sept. 28 (Agencies):

China-i amaknungbo ta tebilemba nung Taiwan-i par defence ulushiba mapang par linük nung yangluba submarine mezüngbuba sayaogo.

Brehostibarnü rongnendak Kaohsiung yimti nung iba submarine sayaba sentong ya Tir Tsai Ing-wen lenisüba kübok agia liasü.

China-i küm ishika tsüngta iba asetkong amaksü mitkar dak tashi lir ta US ketdangsur temi tekumdangtsü shia lir.

Taiwan ya pei sasa yimsü asüba asetkong ka lir, koba China-i ashikülaka jena aoba province ka ama züngshir aser künü anogobo tanaben agitsü ta nangzüka lir.

China-i iba asetkong ya mamaksü südi ta aikati amanger aser Beijing-ia Taiwan den yimjung agi tanaben lungjemtsü meranger ta shia lir.

Ajisüaka Taiwan-i independence mesangdongtsü aser bendang lima nungi teyari magitsü shia lir. China-i iba asetkong nem tebilemtsü tali agüja Taiwan Strait nung military drills agir aser tan ita nunga ishika agiogo.

"Tarutsü mapang nung tanü anogo ya bilemtettsü," ta Tsai-i Taiwan indang nisan keta aliba submarine jakdang nokdaker ashi.

Taoba mapang asen linük nung submarine yanglutsü ya tamakoktsü südi ta bilema liasü,

saka asenoki yanglutetogo, ta lai ashi.

Par asoshi submarine yanglutsü ya Taiwan lenirtem atema tongtipangtiba mapa liasü, saka Tsai lenisüba kübok iba sentong kanga kera atsür ao, shibai mitkar dak senotsü indokba anasü shi agi timba lir.

Sen billion \$1.54 jenjang diesel-electric powered submarine ya tetendanga balala agitsü aser 2024 küm tatem tashinung navy nem agütsütsü, ta mitkar ketdangsur temi ashi.

Iba submarine nem Haikun nungja agütsü, koba tar nunger otsü nung ango tuluka lir aser iba ango yagi ayimer, aser China nunger tejen otsü nunga lir.

Ano submarine ka tang teyangludak lir. Taiwan-i submarine 10 amshitsü nükjidong lir aser yangji ana Dutch nungeri yangluba dena lir aser item submarine ajak nung missiles amshitsü.

Domestic submarine programme tekolakba, Admiral Huang Shu-kuang-i osangbener dang taoba hopta ashiba agi, China nungeri Taiwan amaksü nükjidong nung lungbangtsü merangba mesüra tzüyim nung tenokdangba agütsütsü merangba nungi kumzüksü nükjidong lir.

Iba yagi US aser Japan sepaitem Taiwan indang defence yaritsü asoshi arutsü atema mapang alizüksü, ta pai ashi.

Brehostibarnü submarine

sayaba indang osangbener temi asüngdang dang, Pacific nung par mitkar inyakyim nokdangtsü merangba ya tamachi mapa ka lir, ta Chinese defence ministry odongtar kati ashi.

"Taiwan ruling Democratic Progressive Party ajanga nok-nü komaka aliyonga mesüra yangluyonga tetsü tasoli den tanaben lungjemba menokdangtetsü," ta pai ashi.

China sorkar meyong Global Times ajanga hopta tetenzüklen osang ka adokba nung Taiwan ya süngmangra aiter aser par sentong ya tamakoktsü map aka dang lir, ta shia liasü.

China indang mitkari iba asetkong müketa multidimensional anti-submarine network yanglua lir, ta ashi.

Ajisüaka aikati submarine tasenba yagi Taiwan indang defence tashi itshitsü ta ashir.

Taiwan indang submarine tejang ter ya China den medemdangra kanga ajema lir, kechiaser par ket nung submarine 60 dak tema lir aser item rongnung nuclear-powered attack submarine tem dena lir aser aika tang teyangludak lir.

Ajisüaka iba asetkong ya mapang talangka nungi raradang amshitsü nok-nü balala yanglua arur.

Haikun nungya US defence company Lockheed Martin-i yangluba combat system ka amshir aser US-i yangluba torpedoes amshitsü. Yangji tesüngmangtsü mali, kechiaser US ya China tempa tulutiba lir aser submarine oset, technology aser talent tsütsü UK densema danga linük trok-i Taiwan yari, ta osang ka ajanga ashir.

Adm Huang-i US, Japan, South Korea aser India mitkartem den ajurutepogo ta ashi saka koba linüki yariar ajibo mashi.

Taiwan nüchiso asoshi tashi ain sayuba anema tan ita military drills agitsü ta Beijing-i sangdonger anogo ka lir iba submarine ya sayar alitsü.

Bangladesh nung dengue agi nisung 1,000 jungüa süogo

Dhaka, Rongjui/Sept. 28 (Agencies):

Tawa Bangladesh nung dengue tashidak agi nisung 1,000 jungnüa süogo, koba linük nung iba tashidak tamajungtiba poktetba alitsü ta ketdangsur temi ashir.

Meyi mapang tzinglu kanga sashia aruba ajanga dengue virus bena aliba merila tem tzü tamajung aser atsüngdaka alidak mela-mela apoker.

Ketdangsur temi iba tashidak maziükteter aser mozüki ajunga shiranger agi süngogo.

Dengue agi kanga sashia shiranger temang telung nung azü ayimer aser tasüa asür.

Iba tashidak agi meneper tekolak angur, saktünüsü atur, teret teloktep aser temang angur.

Tropical countries tem nung dengue ya 'endemic' lir aser iba tashidak ya mürekmeju maliba

jila nung timba pokteter, kong iba virus aliba merila timba akumer.

Bangladesh nung iba tashidak ya mapang ka-ka dang liasü, saka tzü-mopung tatsükba aser taiba akumba ajanga 2000 küm mezüng poktetba sülen teti pokteter.

Linük nung tang iba tashidak jateta aliba tia ajurutsü meimlai liasü, kong virus tashi taitba lir, ta public health ketdangsur temi ashir.

Dengue tashidak agi shiranger temang ya tang tekeraba tamajungba akumer, ta doctor temi ashir.

Taoba ita ana tsüngta anogoshi dengue agi nisung 20 jungnüa asü aser taküm iba tashidak agi asüba ya tesüiba küm 22 nung asüba dang timba lir ta ketdangsur temi ashir.

Merila apokba nokdangtsü asoshi Bangladesh nung

awareness campaign tem tenzükogo.

Ajisüaka ano tali nungdaker, ta public health expert Dr Mushtaq Hussain-i ashi.

"Nisung aikati iba tashidak ya khen atema dang, aser anogo ishika lirbo aotsü ta bilemer, anungji mera tajung magir," ta pai ashi.

Dengue tashidak ya Bangladesh nung aliba district ajunga (64) nung pokteta lir, ta World Health Organization ajanga ashir.

Dengue agi shiranger nisung noklang aika linük yimtiba Dhaka nung aliba mozüki bushia arur, saka mozüki timba nung iba tashidak agi shiranger sünga lir.

Mozüki nung intravenous fluids agimar, koba dengue agi shiranger anepalutsü asoshi kanga tongtipang lir.

SÜR KÜM KA AJUNGBA BILEMTETER

Temeim Oja, na onok dak nungi pilar tanü küm ka ajungba anogo nung onoki ne temeim bilemteter. Ne sarasadem aser nai dangar dang yarinüba ano ne sempet tajungtem bilemteter ani oja. Ne mapa tajung onok mulungjang nungi maitokteter.

Temeim Kinüngo, Chirnurtem aser Semchir semnurtem.



Late Mrs. Angumlila Nukshiyim (Yaongyimsen) Asü: 29/09/2022

MOLUNGNEN O



Lt. Mrs. Meyitola 1933 - 18.09.2023

Oja na taochi, ariabilem aser ajemalu agi sünger liasü.

Nü takum ya temoatsü ka liasü.

Nai onok tajungtiba nung anitet.

Onok teti peladaksür na liasü.

Kechi südir süaka nai onok tekangshi aneptsütsü lenmang ngutet,

Na komaka timtema liaka,

Onoki metetba tasü taittiba nisungji na liasü.

Oja onoki na meimer.

Na kong lidir liaka teti pela aser jangratema liang.

Onoki teti meima alila ojala mapang talangka shirangba aser asüba mapang nenoki temolung süngzüksü o tajung ashiba, tanen makai sarasademtsüba aser nungdaka aliba teyari agütsüba nung onok temolung süngzüker aser pelaba lemsateper. Nenok kija shia dang pelaba melemsateptetaka, Tsüngremi nenok ajak moajang ta ozüi sarasademtsür.

- Temeim chirnur, semchir aser anük-apang

Voter timbai Biden anema ken o benoktsü memolunger

Washington, Rongjui/Sept. 28 (Agencies):

Brehostibarnü House Republican temi US Tir Joe Biden anema ken o benoktsü bushisüngdang tenzükner saka vote agütsütsüpur timbai iba maparen inyaksü menüngdak ta ashir.

NBC News poll nung vote agütsütsü tenüng zülüoka alir shilem 56-i Biden tir menden nungi atsüngdoktsü asoshi Congress-i ken o jembi metenzüktsüla ta ashir aser shilem 39-i inyaksüla ta ashir.

Iba ken o benoka jembitsü asoshi House Oversight Committee adenshir, koba Speaker Kevin McCarthy, R-Calif., ajanga hopta ana tejakdang par jabaso Hunter shishilempaba nung Biden tesendaktep aliba bushisüngdangtsü shia liasü, aser ibai tim masüba nung tashi amshir aser ochimashi mapa lir ta McCarthy-i ashir.

Iba ken o nung McCarthy'er telok ya sadanga lir aser voters tema sadanga lir.

Democrats shilem 88-i iba ken o anemer aser Republican shilem 73-i bhukumer. Independent nung nisung ter nungi nisung trok-i maginer aser Congress-i iba ken o benoktsüla ta shilem 29-i ashir.

2016 election nung Russia-i

teka sangshiba indang bushisüngdangba mapang Tir Donald Trump atsüngdoktsü asoshi December 2017 nung ken o benokba den tang survey agiba nung tepila mali.

Iba mapang NBC News/Wall Street Journal poll agiba nung voters shilem 54-i ken o mejembinü aser shilem 42-i jembinüa liasü.

Trump mapang ama masü, Biden anema ken o benoktsüba ya voters asoshi yimtenren tsütsü ajungmesoba ka masü amai ajiteter.

Congress-i Biden anema ken o benoktsü aser pa tir menden nungi atsüngdoktsü asoshi vote agütsüba ajanga taruba küm local congressional races nung temelenshi malitsü, ta voters tesadang kati ashir.

Biden anema ken o benoktsü asoshi vote agütsür ozüng yanglur nem vote magütsütsü akok ta voters shilem 31-i ashir aser shilem 18-i vote agütsütsü ta ashir.

Biden anema ken o benoktsü jembiba nung Republican dangbo Democrats tem ang tejangraba aser GOP voters shilem 60-i iba ama vote yagi parnok memelenshitsü ta ashir.

GOP voters shilem 35-i dang ken o benoktsü bhukumer nem vote agütsütsü ta ashir.

NSF Trophy: New Market FC quarter final-i iogo



23buba NSF Martyrs' Memorial Trophy nung asayaba noksa nung angur.

Kohima, Rongjui/September 28 (TYO): Brehostibarnü 23buba NSF Martyrs' Memorial Trophy nung quarter final atongba team tem rongnung Defending champion New Market Football Club mezüngbuba kümogo. Iba asayamung ya Angami Students Union-i ayongzüka tang Indira Gandhi Stadium Kohima nung asadar.

Tanü tanabuba asaya asayaba mapang defending champs New Market FC-i Mima FC goal 4 agi koka liasü.

Asaya nung NMFC atema mezüngbuba goal ya Neisede Peseyie-i (23) minute 3buba

nung idaktsü aser Khiuwamgbo-i (8) minute 6buba nung tanabuba goal idakja liasü.

Iba sülen Thejasetuo Gwerie-i (7) minute 24 aser 81buba nung goal ana idakja liasü.

Iba asaya atema New Market FC nungi asayar Khiuwamgbo (8) nem man of the match naroküm agüja liasü.

Brehostibarnü mezüngbuba asaya nung Red Scars FC-i goal 6 agi All Nagaland Two Wheelers Taxi Association (ANTWTA) koka liasü.

Red Scars FC atema mezüngbuba goal ya Shalo Kemp-i (9) minute 32buba nung

bicycle kick ka ajanga idaktsü aser paisa minute 35 aser 49 nung goal ana idakja liasü. Maneni Sentsiang (17), Asito Krose (8) aser Sinlo (11) nungeria minute 46, 55 aser 66buba nung goal kaka idakja liasü.

Taoba ASU lenir Akuo Zhasa-i man of the match naroküm Red Scars FC nungi asayar Sinlo kent (11) nem agüja liasü.

September 29 nü asaya:

1. Patkai Christian College vs A Yhome FC @ 11:30 AM
2. End of Era vs Khuzama Youth Organisation @ 1:30PM.

Marseille coach asütsü Gennaro Gattuso shimogo

Rongjui/September 28, 2023 (Agencies): France nung nüngtugu club Marseille indang head coach mapa abentsü atema Bodhbarnü Gennaro Gattuso shimogo. Marcelino Garcia Toral-i taoba hopta mapa toktsüba sülen tang Gattuso shimogo.

"Ni Marseille nung adenba atema kanga pelar aser nema adanger. Ni iba club nungi asayatsü atema maongka nguogo aser iba club ya Europe ajunga nung kanga nüngtugu lir," ta arishi küm 45 tain Italy nung coach yagi ashi.

Gattuso taoba mapang AC Milan aser Napoli na indang head coach liasü, saka taküm küm tetenzüklen pai Valencia toktsüba sülen pa free agent ka liasü.

Pai asaya aliba mapang Italy team nungi World Cup a kokogo aser mapang talangba ka Milan nungi asaya liasü. Gattuso ya tawa Ligue 1 nung Marseille den toktepa club Lyon-i aotsü asoshi sendaktepa liasü.

Taoba hopta Marcelino-i mapa toktsüba sülen Marseille pur mepetmesü nung liasü. Asaya tenet dang achayangba sülen pai mapa tokja liasü.

Pai club toktsüba sülen fan representatives aser club ketdangsürtem tsüngda senden



Gennaro Gattuso

ka mena liasü ajisüaka iba senden nung mepetmesü adok aser Marseille-i, tir Pablo Longoria aser pa kübo lenirtem dang parnoki mapa metoktsüra rara asoshi renema liang ta amokmerena liasü.

Longoria, shiba Marcelino den kanga junga sendaktepa lir, pai pa mapa toktsütsü asadang ajisüaka club metoktsütsü asoshi telemtetba agia liasü.

Deobarnü Paris Saint-Germain goal 4-0 agi makokba sülen Marseille pur Ligue 1 nung tang tibuba nung lir.

Parnok iba season nung Europa League-a asayadar aser taruba hopta Premier League club Brighton & Hove Albion den asayatsü lir. Kasa mapang nung Gattuso-i coach mapa agizükba sülen mezüngbuba asaya Monaco den Honibarnü asayatsü.

Asian Games: India tebur 10m Air Pistol team-i Gold angu



Rongjui/September 28, 2023 (Agencies): Asian Games nung Brehostibarnü tebur 10m air pistol team-i ano gold medal ka nguogo ajisüaka Sarabjot Singh aser Arjun Singh Cheema nati kija asaya nung takok monguteti liasü.

India team nung Sarabjot, Cheema aser Shiva Narwal nung-i China team tera agi koka shooting asaya nung India atema gold medal pezübuba ngutsüogo.

Brehostibarnü iba takok anguba sülen India nung shooter temi tang tashi nung gold pezü, silver pezü aser bronze medal pongu ngua lir.

India nung asayar asem ya senteper point 1734 ngua liasü koba China team dang nungi point ka agi dang timba liasü. Kasa asaya nung Vietnam team-i point 1730 ngua parnoki bronze medal nguogo.

Kija asaya nung Sarabjot aser Arjun na final-i ai ajisüaka pezübuba aser tibuba nung

tembanga liasü.

Kija asaya nung Vietnam nung asayar Pham Quang Huy-i (240.5) gold aser South Korea nung asayar Lee Wonho (239.4) aser Uzbekistan nung asayar Vladimir Svechnikov (219.9) nati silver aser bronze medal ngua liasü.

Kasa asayamung nungsa India tsür Naorem Roshibina Devi-i wushu nung tetsür 60kg sanda event nung silver medal ngua liasü.

Final nung Roshibina-i kanga tasü ita asaya ajisüaka lai China tsür Wu Xiaowei 0-2 agi mekoki silver dang nguteta liasü.

China-i tetsürtemi 60kg category ya amokbanger asaya arudar aser Wu-isa Jakarta-Palembang Asian games nunga gold medal ngua liasü.

Roshibina-i 2018 küm Asian Games nung bronze medal ngur liasü aser taküm silver ngutetogo.

Maneni Brehostibarnüsa India nung Anush Agarwalla-

i Equestrian individual dressage event nung otsüsütsüsa bronze medal ka nguogo.

Brehostibarnü Anush-i point 73.030 nguteta bronze medal angu, koba pa asoshi 19buba Asian Games nung medal tanabuba liasü.

Anogo ana tejakdang pai dressage team event nung gold medal ngua liasü. Pai Hriday Vipul Chheda, Divyakriti Singh aser Sudipti Hajela nung den team asaya nung gold ngua liasü.

India nung rongnungi Hriday Vipul-a final atema qualify asü saka pa indang kor tetsüng yiruba sülen tsukatok. Qualifying round nungbo pa ajak dang temaba jenjang nung liasü.

Iba asaya nung Malaysia nungi Bin Mahamad Fathil Mohd Qabil Ambak-i (75.780) gold medal aser Hong Kong nungi Jacqueline Wing Ying Siu-i (73.450) silver medal ngua liasü.

ODI ranking: Gill-i Babar Azam temeneper dang lir

Rongjui/September 28, 2023 (Agencies): Tesüsabuba sayaba ODI Batting Rankings nung India nung batter Shubman Gill-i rating point aika nguteta pai temaba jenjang nung aliba Pakistan nung asayar Babar Azam temeneper dang lir.

Australia den mezüngbuba ODI asaya ana nung kanga junga asayaba sülen Gill tejakdangi tuogo. Pai asaya ana nung run 178 yanglua liasü. Pai mezüngbuba ODI nung run 74 yanglu aser tanabuba ODI nung century ka yanglua liasü. Asaya ana nung kanga junga asayaba sülen Gill-i rating points 847 ngutetogo aser Babar meneptsü asoshi point 10 dang nungdaker.

Pakistan team taruba ODI asaya World Cup nung asayatsü aliba den Gill Australia den

tasembuba ODI nung masayaba sülen Babar maneni temaba jenjang nung sür World Cup asayatsü.

Batting ranking nung South Africa nung Rassie van der Dussen tasembuba aser Ireland nung asayar Harry Tector pezübuba nung lir.

India nung asayatem rongnungi Shreyas Iyer-a jenjang ti tejakdangi tua tang 30buba aser KL Rahul jenjang trok tejakdangi tua 33buba nung lir. Bowler tem rongnung Mohammed Shami-a jenjang teku tejakdangi tua tang 25buba nung lir.

Bowler tem rongnung Mohammed Siraj maneni temaba jenjang nung lir saka pa point 11 agi dang Australia nung asayar Josh Hazlewood-i memeneper lir.

YRS-i Sepaktakraw atema asayar shimtsü

Dimapur, Rongjui/September 28 (TYO): Youth Resources and Sports Department-i ayongzüka district level inter-high school tournament den Chümoukedima aser Peren district atema Sepaktakraw (Regu event) asaya asoshi tetsür aser tebur asayatem shimtsü. Iba asayamung ya October 6 aser

7 nü asayatsü. Iba asayamung nung shilem agitsü jangrartemi teküboklen agüja aliba number ajanga October 4 nü tashi nungbo tongteprateptsü mepeshia metetdaksüogo.

Contact number: Chümoukedima ditrict - 7005278134 and Peren - 6909199200.

BILEMDANGANG

"Tangar tenzükba nung temaotsü aser tepela lir."